


Awa

ta e fuente basico di bida



Bida di e ser humano y di cualquier ser na mundo no ta posibel sin awa pasobra awa mescos cu oxigeno ta di esencia primordial pa existencia di e ser humano na mundo.

Na Aruba ta nos grandinan so ainda ta corda e tempo cu awa no tabata algo cu por a ser haya dje facil ey, manera cu awendia si ta e caso pasobra antes awa tabata un materia hopi schaars y pueblo tabata cuida su fuentenan di awa.

Awa tabata worde saca di pos of di regenbak y si no tabata tin yobida y si nivelnan di posnan den e mesun temporada tabata baha, anto pa pueblo esaki tabata un preocupacion hopi

grandi.

No tabata tin bañamento cu awa den abundancia manera cu awendia si ta e caso pasobra awa no tabata un facilidad comun manera cu awendia si nos por disfruta na grandi di dje.

WEB Aruba NV ta e compania mas importante den funcionamiento y existencia di pais Aruba pasobra fuera di e hecho cu WEB ta destila awa di laman pa esaki por worde consumi y uza, WEB ta genera electricidad tambe y sin awa y electricidad pais Aruba y ningun otro pais na mundo por funciona.

Ken por imagina su mes den e epoca aki cu awa no ta sali di cranchi mas y cu tur hende mester bay saca awa di pos pa bebe?

Si esaki mester socede anto esaki lo ta un drama grandi pa Aruba pasobra ni suficiente pos tin pa tur hende por haya awa pa bebe y awanan cu tin actualmente den posnan na Aruba no ta sirbi pa consumo humano.




Consumo di awa lo bira despues di aña dos mil un problema mundial pasobra e cantidad di awa cu dia pa dia ta disponible pa consumo humano, ta bahando drasticamente debi na contaminacion di medio ambiente mundialmente.

Rieunan, lagonan, fuentenan natural y lamannan na mundo dia pa dia ta yena cu tur sorto di contaminacion cemico, cu ta haci cada biaha mas dificil pa por procesa awa pa consumo humano y pa agricultura.

Ya caba a ser calcula durante Convencionnan mundial cu ta trata e problematica di awa na mundo, cu e prijs di awa lo subi drasticamente durante e proximo 20 aña y na un dado momento lo bira un luho na lugar di ta un necesidad basico primordial riba cual cada ser humano na mundo tin derecho riba dje.

E posibilidad cu cierto paisnan por bay te hasta den guerra cu otro pa awa, ya a presenta su mes algun aña pasa y den futuro e posibilidad riba un peligro di guerra pa awa lo aumenta mas ainda.



Na Aruba Dios ta generoso cu e pueblo pasobra Aruba ainda ta dispone di lamannan relativamente limpi cu ta worde uza pa destilacion di awa pa bebe, pero na Aruba tambe e impacto di contaminacion di awanan di laman, ta un proceso cu ta andando silenciosamente sin cu pueblo realmente ta conciente di e peligernan grandi cu contaminacion di awa di laman y di awa bao tera ta trece cune.

Cuanto hende na Aruba ta na altura con WEB ta produci awa pa bebe?

Cuanto hende na Aruba a yega di puntra nan mes ta di con e awa di Aruba tin un sabor asina dushi y di calidad asina halto, cu te hasta e awa di Aruba ta den e top 5 di mundo?

E proceso pa produci awa pa bebe na Aruba ta un proceso cu ta exige hopi energia y dedicacion combina cu responsabilidad grandi di tur e empleadonan di WEB Aruba NV.

HOLA Aruba lo bin cu informacionnan den proximo edicionnan specialmente dedica na produccion di awa y consumo di awa na Aruba.

Di con e awa na Aruba no tin e sabor di cloro manera cu na otro islanan y paisnan si ta e caso?

E awa di Aruba tin un sabor unico y tremendo debi cu den e fase final di produccion di awa pa bebe, WEB Aruba NV ta aplicando un proceso unico na mundo pa duna e awa un sabor natural y dushi y alavez percursa pa e awa tin e mineralnan esencial pa esaki ta apropiada pa bebe.

Awa di WEB Aruba NV ta ser pasa den bakinan yena cu piedranan di coral, pa asina e awa haya su sabor autentico y na mesun momento mineralnan natural ta ser añadi na e awa.

Tur turista, experto y otro bishitantenan rond mundo cu a yega di mira e proceso di produccion di awa na Aruba, a keda completamente babuca y na mesun momento hopi impresiona di e forma con na Aruba awa pa bebe ta worde produci.

Mas leu cu ta conoci ta na Aruba so awa pa bebe ta worde procesa manera cu WEB ta haci cu e bakinan yena cu piedranan di coral, pa asina duna e awa su sabor netamente Balashi Cocktail y percursa pa e awa tin suficiente mineral natural den dje.

Hopi compania na mundo ta bende awa den boter cu nan ta propaga como awa mineral cu nan ta saca di fuientenan natural, pero ta na Aruba so awa destila den cierto sentido ta worde converti den un sorto di awa mineral di calidad halto, cu te awe no por a ser igual door di ningun pais na mundo.

Awa ta bon pa e curpa y salud di e ser humano, pero na e mesun momento nos mester bira mas conciente riba uzo di awa y cuido di nos reservanan di awa y esaki ta inclui tuberia na cas y uzo di filtronan.

